




ხაშურის მოახბა



№2(326)

24 იანვარი, ორშაბათი,

2022 წელი

საკრებულოს კომისიებმა მუნიციპალიტეტის მერიის განყოფილებების ანგარიშები მოისმინეს

20 იანვარს, ხაშურის მუნიციპალიტეტის საკრებულოს კომისიებმა გეგმით გათვალისწინებულ საკითხებთან დაკავშირებით, სხდომები გამართეს.

სივრცით-ტერიტორიული დაგეგმარებისა და ინფრასტრუქტურის კომისიამ მოისმინა მუნიციპალიტეტის მერიის ინფრასტრუქტურის განვითარებისა და კეთილმოწყობის განყოფილების უფროსის გიორგი

პაპიაშვილის ანგარიში 2021 წელს გაწეული მუშაობის შესახებ. (იხ.2-ე გვ).

ქონების მართვისა და ბუნებრივი რესურსების საკითხების კომისიის სხდომაზე მუნიციპალურის ქონების აღრიცხვისა და მართვის განყოფილების მიერ 2021 წლის IV კვარტალში გაწეული საქმიანობის ანგარიში ბეჟა მაისურაძემ წარმოადგინა.

მომხსენებლებმა უპასუხეს კომისიის წევრების მიერ დასმულ შეკითხვებსა და მოსაზრებებს.

დიდთოვლობა ჩვენს მუნიციპალიტეტში

ხაშურში დიდთოვლობაა... წლებს, ზამთარი მართლაც რომ ზამთრობს. წინასწახალწლო სამზადისშიც აქტიურად ჩაერთო და ახალ წელსაც სხვა ლაზათი და შნო შესძინა ხაშურში მოსულმა უხვმა თოვლმა. უკვე აღარ კი გვახსოვს, ბოლოს, რამდენიმე წლის წინ, როდის გაგვახარა ხვავრიელი თოვლის მოსვლამ და ამავე დროს, როდის შეგვექმნა, მუნიციპალიტეტში, დიდთოვლობის გამო, საგზაო თუ ინფრასტრუქტურული პრობლემები... ასე რომ, ხაშურსა და მუნიციპალიტეტის სოფლებში დეკემბრის შუა რიცხვებიდან ინტენსიურად თოვს. როგორც ხაშურის მუნიციპალიტეტის მერიამ განმარტავენ, დიდთოვლობის დაწყებიდან დღემდე მოხილიზებულია ა(ა) იპ „ხაშურსერვისის“ სამსახური. დიდთოვლობისგან გამოწვეული საგზაო შეფერხებების საწინააღმდეგო სამუშაოები გრძელდება. ინფორმაცია მიმდინარე სამუშაოების შესახებ ეტაპობრივად განახლებადია. ამ დროისთვის ტექნიკური მარილი მოყრილია ხაშურის ქუჩებში, სოფელ ბეკმის მისასვლელ გზაზე, სურამში, ასევე ნარვანის ჩასასვლელთან. საჭიროებისამებრ, სხადასხვა დროს მიმდინარეობს სასოფლო გზების წმენდითი სამუშაოები. ამ დროისთვის გაწმენდილია ქვიშხეთში, ბულბულისციხესა და მონასტერში, ცოცხნარასა და ცედანში, ტეხერში, სავანისუბანსა და რუსანთუბანში, ქემფერში და სხვა სოფლებში მისასვლელი გზები.

უამინდობის გამო, შეზღუდვებია ცენტრალურ მაგისტრალზეც, სადაც ტრანსპორტის მოძრაობა სპეციალური რეჟიმებით ხორციელდება. საავტომობილო გზების დეპარტამენტის ინფორმაციით, გადაადგილება ნებადართულია მხოლოდ მოცურების საწინააღმდეგო ჯაჭვების გამოყენებით.

რაც შეეხება, ამ კვირის ამინდს, სინოპტიკოსები, ჯერ-ჯერობით, საიმედო პროგნოზს ვერ გვპირდებიან. მართალია, ყინვა ოდნავ იკლებს,



მაგრამ მზიანი ამინდები არ ჩანს და გამოდარებას უფრო თებერვლის პირველი დეკადის შემდეგ ვარაუდობენ.

ხაშური საქართველოს გულია

„ხაშური საქართველოს გულია“ - ბანერი, რომელიც ხაშურის შესასვლელთან - ავტომაგისტრალზე წინასწახალწლოდ აინთო, პოზიტიურ მოვლენად იქცა და არამარტო ხაშურელებისათვის. შეიძლება თამამად ვთქვათ, რომ საქართველოში ყველა გზა ხაშურზე გადის, ჰოდა, აქეთობას და იქითობას მოძრავი მგზავრები ჩერდებიან, სამახსოვრო ფოტოებს იღებენ, სოციალური ქსელის მომხმარებელი აზიარებენ ბანერის შექმნის შესახებ ინფორმაციას, ხაშურელები ამაცობენ... ხაშური ხომ საქართველოს გულია...

ეს სიახლე ჩვენი ქალაქისათვის დიდი გულით და სიყვარულით შეიქმნა და იმედს ვიტოვებთ ჩვენც და მკითხველიც, რომ მშობლიური ქალაქისათვის საიმეჯო პროექტების შექმნა და განხორციელება მომავალშიც აქტიურად გაგრძელდება და ხაშური არ იქნება მავანთა და მხოლოდ ავის მოსურნეთა საქილკო...

იდეა ხაშურის მუნიციპალიტეტის მერს თენგიზ ჩიტიაშვილს ეკუთვნის, რომლის რეალიზება ხაშურის მუნიციპალიტეტის საკრებულოს თავმჯდომარის



პირველმა მოადგილემ ლევან გამრეკელმა განახორციელა, რომელიც უფრო დეტალურად გვესაუბრა სარეკლამო ბანერის იდეისა და მისი განხორციელების შესახებ.

- თავდაპირველად, როდესაც შედგა ახალ არჩეული საკრებულო, მისმა წევრებმა გადაწყვიტეთ, ხაშურისათვის რაიმე განსაკუთრებული შეგვემატებინა, რაც

იქნებოდა მისთვის სავიზიტო ბარათი. იდეა წამოვიდა ხაშურის მერის თენგიზ ჩიტიაშვილისაგან. მომზადებულიყო პროექტი, რომელიც მოიაზრებდა მაღალი ხილვადობის მქონე ტერიტორიაზე სარეკლამო ბანერის განთავსებას, ბანერი გამოსახავდა ფრაზას „ხაშური საქართველოს გულია“. პირველ ეტაპზე იყო მოსაზრება, რომ განთავსებულიყო ბანერი „ღორინამკალის“ მთის მწვერვალზე,

თუმცა იმის გამო, რომ ხილვადობა სუსტი იქნებოდა, „ღორინამკალთან“ დაკავშირებული იდეა გამოირიცხა. მხოლოდ ამის შემდეგ გადაწყდა, ბანერი განთავსებულიყო ხაშურის შემოსასვლელში.

- ბუნებრივია, იდეის განხორციელების გზების ორგანიზების პროცესში ჩაერთნენ შესაბამისი სპეციალისტებიც...

- იდეის განხორციელებაში თავიდანვე აქტიურად ჩავერთეთ ბატონი თენგიზი და მე, შეირჩა სარეკლამო კომპანია, რომელიც განახორციელებდა პროექტის ფარგლებში დაგეგმილ მოსამზადებელ და სამონტაჟო სამუშაოებს სარეკლამო ბანერის განსათავსებლად. მოვიწვიეთ კომპანიიდან სპეციალისტები, რომლებმაც განახორციელეს სარეკლამო ბანერის განთავსებისათვის შერჩეული რამდენიმე ადგილის დათვალიერება, სწორედ მათი შეფასებითა და რჩევით გამოირიცხა ბანერის „ღორინამკალზე“ განთავსება ცუდი ხილვადობის გამო, და ასევე მათი მუშაობის შედეგად, შეირჩა ყველაზე ოპტიმალური ადგილი ბანერის განსათავსებლად, ხაშურის შემოსასვლელში, ავტომაგისტრალთან მდებარე ტერიტორია. ადგილი, რომელიც უნდა გაიაროს აღმოსავლეთ და დასავლეთ საქართველოში ნებისმიერი მიმართულებით მოძრავმა მგზავრმა...

- რა მოცულობისაა სარეკლამო ბანერი?

- ბანერის სიგრძე 12 მეტრს შეადგენს, სიგანე კი 1.5 მეტრია... სიმაღლე 2 მეტრს მოიცავს. ბანერი განთავსდა. ხაშურის შემოსასვლელში და მუდმივად შეახსენებს მგზავრს, რომ ხაშური საქართველოს გულია...

- როგორია სარეკლამო ბანერის განთავსებასთან დაკავშირებით მოსახლეობის დამოკიდებულება, მათი გამოხმაურება?

- სარეკლამო ბანერის განთავსებამ, ბუნებრივია, გაამართლა - ხაშურელების მხრიდან პოზიტიური გამოხმაურება მოჰყვა, განსაკუთრებით აქტიურობენ სოციალური ქსელის მომხმარებლები, რომლებიც მხოლოდ დადებით შეფასებებს აკეთებენ სარეკლამო ბანერის განთავსებასთან დაკავშირებით... მსგავსი ფორმით სარეკლამო ბანერი საქართველოში ერთადერთია და არ აქვს ანალოგი, ბანერი შინაარსობრივად და ფორმითაც ორიგინალურია, რაც, თავისთავად, ხაშურის გეოგრაფიული მდებარეობიდანაცაა გამომდინარე.

- ბატონო ლევან, ხომ არ არის დაგეგმილი ხაშურის საიმეჯო მსგავსი პროექტების განხორციელება მომავალშიც?

- იდეის დონეზე მიმდინარეობს მუშაობა სხვადასხვა პროექტებზე, მაგრამ ეს სამომავლოდ და ვისაუბრეთ მაშინ, როდესაც განვახორციელებთ, რა თქმა უნდა, პროექტები დაიგეგმება ხაშურის საჭიროებებიდან გამომდინარე...

თ. ახალკაცი

ხაშურის მუნიციპალიტეტის მერიის ეკონომიკური განვითარების სამსახურის ინფრასტრუქტურის განვითარებისა და კეთილმოწყობის განყოფილების ანგარიში 2021 წელს გაწეული მუშაობის შესახებ

ინფრასტრუქტურის განვითარებისა და კეთილმოწყობის განყოფილება როგორც მოგესხებათ, მუშაობს ინფრასტრუქტურული პროექტების შემუშავებაზე და ახორციელებს დაგეგმილი ინფრასტრუქტურული პროექტების მიმდინარეობის მონიტორინგს და შეფასებას, ასევე, ობიექტის მიღება-ჩაბარების მიზნით, თითოეული ინფრასტრუქტურული პროექტის ხელშეკრულების პირობების შესრულებაზე კონტროლის ზედამხედველობას. განყოფილებაში დასაქმებულია 9 მოსამსახურე, მათ შორის 2 შტატგარეშე მოსამსახურე.

2021 წელს განსახორციელებული ინფრასტრუქტურული პროექტები :
საქართველოს მთავრობის 2021 წლის 31 მაისის N885 განკარგულების („საქართველოს რეგიონებში განსახორციელებელი პროექტების ფონდიდან მუნიციპალიტეტებისათვის თანხის გამოყოფის შესახებ“ საქართველოს მთავრობის 2020წ. 31 დეკემბრის N2685 განკარგულებაში ცვლილებების შეტანის თაობაზე“) საფუძველზე, საქართველოს რეგიონებში განსახორციელებელი პროექტების ფონდის დაფინანსებით, მიმდინარეობს - 9 პროექტის განხორციელება, რომელთა სახელმძღვანელო ღირებულება შეადგენს 6 589 798 ლარს.

1. სოფელ ღუმაცხოვში მისასვლელი გზის მოასფალტება - 535 138 (დასრულებული);
2. სოფელ ქინძათში გზის მოასფალტება - 815 000 (დასრულებული);
3. სოფელ სავანისუბნამდე მისასვლელი გზის მოასფალტება - 674 230 (დასრულებული);
4. სოფელ ნაბახტევში გზის მოასფალტება - 1 184 739 (60% შესრულება);
5. სოფელ რუსაანთუბნამდე ბეტონის გზის დაგება - 818 384 (დასრულებული);
6. სოფელ მონასტერში ბეტონის გზის დაგება - 559 535 (40% შესრულება)
7. სოფ. ვაყის ხიდიდან სოფ. ტკოცამდე გზის მოასფალტება - 965 505 (დასრულებული);
8. დაბა სურამში მდ. სურამულაზე მარჯვენა ნაპირსამაგრი კედლის მშენებლობა - 464 000 (დასრულებული);
9. ორანქედის მონასტერში მისასვლელ გზაზე ბეტონის საფარის მოწყობა (სოფელი კრისხევი) – 573 267 (დასრულება);
ადგილობრივი ბიუჯეტით განხორციელდა 45 პროექტის დაფინანსება, რომელთა ღირებულება ამ ეტაპზე შეადგენს 7 203 617.39 ლარს
1. დაბა სურამში, მათიაშვილის ქუჩის მოასფალტება - 234 900 ლ. (დასრულება);
2. დაბა სურამში, თაყაიშვილის ქუჩის მოასფალტება - 187 650 ლ. (დასრულება);
3. დაბა სურამში, ამაღლების ქუჩის მოასფალტება - 155 377 ლ. (დასრულება);
4. დაბა სურამში, სარაჯიშვილის ქუჩის მოასფალტება - 187 563 ლ. (დასრულება);
5. სოფელ ტაშისკრიდან სოფელ ქვიშხეთამდე გზის მოასფალტება - 1 099 695 (დასრულება);
6. ქ. ხაშურში იმერეთის ქუჩაზე მინი სტადიონის მშენებლობა - 99 940 (დასრულება);
7. სოფელ წრომში, მინი სტადიონის მშენებლობის გაგრძელება - 55 122 ლ. (დასრულება);
8. სოფელ დიდ ბეკამში, მინი სტადიონის მშენებლობის გაგრძელება - 53 990 ლ. (დასრულება);
9. სოფელ დიდ ფლევიში, წყლის ჭაბურღილის მოწყობა - 526 000 ლ. (მიმდინარე, შესრულება 90%);
10. ქ. ხაშურში, კულტურის სახლის სცენისა და დარბაზის რეაბილიტაცია - 904 289 ლ. (მიმდინარე, შესრულება 50%);
11. ქ. ხაშურში, ცხვირაშვილის ქ. N11-ში (74 760 ლ.), რუსთაველის ქუჩა N16-ში (70 726 ლ.) და ბორჯომის ქუჩა N58-ში (62 452.27 ლ.) მდებარე მრავალბინიან საცხოვრებელ კორპუსებში ლიფტების რეაბილიტაცია (დასრულება);
12. დაბა სურამში, მდინარე სურამულაზე ნაპირსამაგრი კედლების მშენებლობა რეაბილიტაცია - 235 000 ლ. (დასრულება);
13. სოფელ ალში, სანიაღვრე არხის მოწყობა - 35 699.01 ლ. (დასრულება);
14. ქ. ხაშურში, ფარნავაზის ქუჩაზე სკვერის და გარე ტრენაჟორების მოწყობა - 40 000 ლ. (დასრულება);
15. ქ. ხაშურში, თამარ მეფის ქუჩაზე კულტურის სახლის მიმდებარე გარე ტრენაჟორების მოწყობა - 25 000 ლ. (დასრულება);
16. სოფელ ბეკამში, სანიაღვრე არხის მოწყობა - 30 000 ლ. (მიმდინარეობს პროექტირება);
17. სოფელ ოძისში და სოფელ ცივწყაროში (4*2 მ) ზომის ორის მოსაცდელის მოწყობის სამუშაოები - 16 153.2 ლ (დასრულება);
18. სოფელ ბრილიში, ხიდის მოწყობა - 35 606.5 ლ (დასრულება);

19. სოფელ ვაყის ხიდიდან სოფელ ტკოცამდე გზის მოასფალტება 441 000 ლ. (მიმდინარე);
20. ქ. ხაშურში წმიდა დიმიტრი ყიფიანის სახელობის სკვერის რეაბილიტაცია - 566 698 ლ (მიმდინარე);
21. ქალაქ ხაშურში, ჯანდაცვის ცენტრისა და ჰემოდიალიზის შენობის მიმდებარე ტერიტორიის კეთილმოწყობის სამუშაოების შესრულება - 36 069 ლ. (დასრულება);
22. ხაშურის მუნიციპალიტეტის ტერიტორიაზე ორმოულის სამუშაოები - 98 500 ლ. (დასრულება);
23. ქალაქ ხაშურში, შუმის ქარხნის დასახლებაში ბიბლიოთეკის რეაბილიტაციის სამუშაოების შესრულება - 39 670.42 ლ. (დასრულება);
24. ხაშურის მუნიციპალიტეტის სოფელ ქვიშხეთში (მჭედლიშვილების უბანში) გზის დამკვიდრებელი ნაპირსამაგრი კედლის მშენებლობის და მისასვლელი გზის კეთილმოწყობა - 148 445.57 (მიმდინარე);
25. ხაშურის მუნიციპალიტეტის ტერიტორიაზე სიჩქარის შემზღვევითი ბარიერების და საგზაო ნიშნების მოწყობის შესრულება-მონტაჟი - 43 946.09 ლ. (დასრულება);
26. ქალაქ ხაშურში, იმერეთის ქუჩაზე საჩრდილოებელი ფანჯატურის და ტრენაჟორების მოწყობა - 23 755.76 ლ. (დასრულება);
27. ქალაქ ხაშურში, ე.წ. „ემტეესის“ დასახლებაში და გაგარინის ქუჩაზე საბავშვო ატრაქციონების მოწყობა - 41 984.4 (მიმდინარე);
28. ქალაქ ხაშურში, ჭალისუბნის დასახლებაში (ყოფილი აგურის ქარხნის ტერიტორიაზე) საბავშვო ატრაქციონების მოწყობა - 20 780.98 ლ. (დასრულება);
29. სოფელ ალში, მინისტადიონის (26*16მ) მოწყობა- 82 122.1 (დასრულება);
30. სოფელ ვაყაში, სანიაღვრე არხის მოწყობა - 62 276.86 ლ. (მიმდინარე);
31. ქალაქ ხაშურში, თამარ მეფის ქუჩაზე და ე.წ. „ქიმიკების უბანში“ საჩრდილოებელი ფანჯატურის და ტრენაჟორების მოწყობა- 51 318.2 ლ. (დასრულება);
32. ქალაქ ხაშურში, ე.წ. „მინდარის“ დასახლებაში საბავშვო ატრაქციონების მოწყობა - 20 758.56 ლ. (დასრულება);
33. ქალაქ ხაშურში შუმის ქარხნის დასახლებაში საბავშვო ატრაქციონების მოწყობა - 20 903.7 ლ (მიმდინარე);
34. დაბა სურამში, მდინარე ბიჯნისულას (მდინარე სურამულას შესართავთან) მარჯვენა ნაპირსამაგრი კედლის რეაბილიტაციის და ფსკერის ფილის მოწყობა - 44 954.46 ლ (დასრულება);
35. დაბა სურამის N1 საჯარო სკოლის რეაბილიტაცია - 69 512.62 ლ. (დასრულება)
36. სოფელ კლდისწყაროს სპორტდარბაზის რეაბილიტაცია - 41 890 ((დასრულება);
37. ხაშურის მუნიციპალიტეტის სოფლებში გზების მოხრეშვა - 278 617 ლ. (დასრულება);
38. ხაშურის მუნიციპალიტეტის სოფლებში ბეტონის გზების დაგება - 178 977.57 (დასრულება);
39. დაბა სურამში (პარკის უკან), მდინარე სურამულაზე, მარჯვენა ნაპირსამაგრი კედლის მშენებლობა 464 000 ლ. (დასრულება);
40. სოფელ ქვემო ბროლოსნის საჭიდაო დარბაზის რეაბილიტაცია - 12 278.2 ლ. (დასრულება);
41. დაბა სურამში, აღმშენებლის ქუჩის N8-ის და წმ. მარიაშვილის ქუჩის N13-ის მიმდებარე ნაპირსამაგრი კედლების მოწყობა - 209 996.43 (მიმდინარე);
42. ხაშურის მუნიციპალიტეტის სოფელ ვაყაში გზის რეაბილიტაცია - 349 000 ლ. (დასრულება);
43. ქალაქ ხაშურში თამარ მეფის ქუჩაზე მდებარე სამუსიკო სკოლის რეაბილიტაცია - 44 576.44 (დასრულება);
44. ქალაქ ხაშურში იმერეთის ქუჩის მიმდებარე მინი სტადიონის (26*16მ) და ატრაქციონების მოწყობა - 99 940 ლ (დასრულება);
45. სოფელ წრომში მინი სტადიონის (26*16 მ, მეორე ეტაპი) მოწყობა 55 122 ლ. (დასრულება).

სოფლის მხარდაჭერის პროგრამის ფარგლებში დაფინანსებულია - 79 პროექტი, რომელთა ღირებულება შეადგენს 904 000 ლარს. (საქართველოს მთავრობის 2021 წლის 5 თებერვლის №168 განკარგულება).
მუნიციპალური განვითარების ფონდის დაფინანსებით მიმდინარეობს 1 პროექტი - ქ. ხაშურში ცენტრალური საფეხბურთო სტადიონის მშენებლობა, რომლის სახელმძღვანელო ღირებულება შეადგენს 6 500 000 ლარს, თანადაფინანსება 1 196 172 ლარით. პროექტი გარდამავალია და დასრულდება 2022 წელს.

ასევე მიმდინარეობს :

1. ქ. ხაშურში პროფსასწავლებლის მშენებლობა - 9 835 935 ლარი;
2. ქ. ხაშურში იუსტიციის სახლის მშენებლობა 4 300 000 ლარი;
3. სოფელ ქემფერის საჯარო სკოლის რეაბილიტაცია - 1 792 000 ლო;
4. სოფელ ქინძათის 150 მოსწავლეზე გათვლილი საჯარო სკოლის პროექტირება/მშენებლობა - 2 411 228 ლ.

გიორგი პაპიაშვილი,
ხაშურის მუნიციპალიტეტის მერიის ეკონომიკური განვითარების სამსახურის ინფრასტრუქტურის განვითარებისა და კეთილმოწყობის განყოფილების, მეორადი სტრუქტურული ერთეულის ხელმძღვანელი

- სპეციალისტი გვირჩევეს -

ინფორმაციისათვის ჩემი საფუტკრეები განლაგებულია ზღვის დონიდან 800–დან



(დასასრული V გვერდზე)

ფუტკრის საკვებად ინვერსიული სიროფის გამოყენება

ზამთარში უკვე ორი წელიწადია ფუტკრის ოჯახის გამოსაკვებად საჭიროების შემთხვევაში ინვერსიულ სიროფს ვხმარობ.

ინვერსიული სიროფი მიიღება შაქარის სიროფზე ინვერტაზის დამატებით, როგორცაა ლიმონმჟავა, თაფლი და ა.შ. დამატების პროცესში შაქრის სიროფში ხდება ჰიდროლიზის რეაქცია – შაქრის სახაროზა იშლება გლუკოზად და ფრუქტოზად. პროცესი მიდის რამოდენიმე საათიდან, რამდენიმე დღემდე, მიღებული სიროფი იზომება ხელსაწყოთი, რომელსაც პოლიმეტრი ჰქვია. ფუტკრის ოჯახზე სიროფის რაოდენობა თვითონ ფუტკრის ოჯახის საჭიროებიდან გამომდინარეა.

ინვერსიული სიროფის მომზადების ბევრნაირი წესი არის ლიტერატურაში მითითებული, მე გთავაზობთ ჩემს მიერ აღებულ და უკვე გამოცდილ პროპორციებს(ჩემი აზრით, დასამზადებლად ადვილია და ეკონომიური.

ფუტკრის საკვებად ინვერსიული სიროფის გამოყენება

(დასასრული)

1100მეტრამდე).

ინვერსიული სიროფის შემადგენლობა ზამთრის პირობებში: წყალი-100%, შაქარი-200%, ლიმონმჟავა-0,2%, თაფლი 5%.

მაგალითად: 10 ლიტრ წყალში იხსნება 20 კილოგრამი შაქარი, 20 მილიგრამი ლიმონმჟავა და 0,5 კილოგრამი თაფლი.(შეგიძლიათ მარტო თაფლი იხმაროთ, კონკრეტულ შემთხვევაში 2 კილოგრამი.)

მომზადების პროცესი:

აღუღებულ წყალში იხსნება შესაბამისი რაოდენობის შაქარი, მთლიანად გახნის შემდგომ, ემატება მცირე რაოდენობის აღუღებულ წყალში გახსნილი ლიმონმჟავა და ბოლოს, თაფლი. მიღებული სიროფი ოთახის ტემპერატურაზე(20-25 გრადუსი) ჩერდება 3 დღე და ხდება მისი ინტენსიური შერევა(დღეში 3-ჯერ).

ფუტკრის ოჯახზე მიწოდების წესი:

ფუტკრის ოჯახს ინვერსიულ სიროფს პლასმასის ბოთლებით ვაძლევ, რომელსაც სადგისით მხოლოდ ერთ ადგილას ვხვრეტ. ბოთლს ვათავსებთ ნახვრეტით გუნდის თავზე(ნახვრეტი აუცილებლად ჩარჩოებს შორის უნდა მოხვდეს).

იანვარის თვეში, საკვების მიცემას ვახდენთ ერთჯერადად 600 მილიგრამის რაოდენობით, დაახლოებით 10-15 იანვრამდე(ფუტკრის გუნდი ჩარჩოს მაღლა თამასაზე უნდა იყოს ამოსული არმისული შუა ჩარჩომდე. ზამთრის პერიოდში მთავარია ფუტკრის გუნდი ჩვენს რეგიონში არასაკმარისი ან უხარისხო საკვების გამო, საფრენის მოპირდაპირე კედლამდე არ უნდა მივიდეს 10-15 თებერვლამდე).

თებერვლის თვეში, ფუტკრის ოჯახს ინვერსიულ სიროფს 2-ჯერ 600-600 მილიგრამ რაოდენობით ვაწვდი, რაც სრულიად საკმარისია ნებისმიერი ფუტკრის ოჯახისათვის(ცნობისათვის, დეკემბრის ბოლოს და იანვრის დასაწყისში ვაერთიანებ ყველა იმ ფუტკრის ოჯახს, რომლის გუნდიც 4 ჩარჩოს შორის მოექცევა, ამ დროს გაერთიანებას ვახდენთ პირდაპირ ჩარჩოების გადატანით, გარემოს ტემპერატურა 0 გრადუსზე დაბალი უნდა იყოს).

უპირატესობები:

- 1) ფიზიკურ-მექანიკური თვისებებით უახლოვდება თაფლს;
 - 2) ინვენსიური სიროფის გადამუშავებისას ფუტკრები ნაკლებად ცვდებიან;
 - 3) ფუტკრების სიცოცხლის ხანგრძლივობა იზრდება, ვიდრე ჩვეულებრივი სეროფის გამოკვებისას;
 - 4) სუსტი ოჯახები ადვილად ითვისებენ;
 - 5) კვების პროცესში არ ხდება ინვენსიური სიროფის დანაკარგი;
 - 6) უხარისხო თაფლის არსებობის შემთხვევაში საუკეთესო საკვებია;
 - 7) ინახება დიდხანს, ბნელ და გრილ ადგილზე.(2 კვირის მანძილზე გამიჩერებია);
 - 8) ინვერსიული სეროფიდან მიღებული თაფლი არ კრისტალიზდება;
 - 9) ეკონომიური-თაფლთან შედარებით იაფია;
 - 10) ფუტკრები დაბალ ტემპერატურაზეც კარგად ითვისებენ;
 - 11) მასში მიკროორგანიზმები ძნელად მრავლდებიან-აქვს კონსერვაციის უნარი; რჩევები
- 1) არ იხმაროთ ალუმინის ჭურჭელი;
 - 2) მომზადებისას ინვერსიული სიროფის დუღილი არ შეიძლება;

- 3) წყალი რბილი უნდა იყოს-წყაროს წყალი;
- 4) საჭიროა სისტემატური მორევა;
- 5) აუცილებელია სისუფთავის დაცვა, რათა არ მოხდეს სიროფის ამჟავება;
- 6) შეიძლება იხმაროთ დაკრისტალბული თაფლიც. თუ გეუჭებათ თაფლის ხარისხი, გახსენით 1/1-ზე აღუღებულ წყალში, შემდგომ წამოაღულეთ 1-2 წუთი და მაღლა მიღებული ფენა მოაგალეთ;
- 7) საკვების მიცემისას, იანვარში და თებერვალში, ფუტკრის ოჯახს ვაფარებ მხოლოდ ცელოფანს.(იანვრამდე არც გადასაფარებელს ვხმარებ ფუტკრის ოჯახზე



და არც ბალიშს ყველა სკა აღჭურვილია ბალიანი ძირით). ნესტის შემთხვევაში ვახდენთ მცირე საჭაეროს დატოვებას საფრენის მოპირდაპირე მხარეს;

8) ბალიში ან ნებისმიერი დასათბუნებელი, ფუტკრის ოჯახს ზემოდან ედება მხოლოდ სუსტი ოჯახის შემთხვევაში;

9) პლასმასის ბოთლებში ჯერ ჩაასხით, ადგილზე კი ნახვრეტი გაუკეთეთ, უკვე არსებულში ჩასხმისას დააკვირდით ნახვრეტი სანთლით არ იყოს შევსებული;

10) ყურადღებით მოეპყართ ინვენსიულების პროცესს, თუ პროცესი დასრულებული არ არის სიროფი გაგიფუჭდებათ(როგორც, მაგალითად მურაბა და კომპოტი);

ნებისმიერი შეკითხვისათვის შეგიძლიათ დამიკავშირდეთ ტელეფონზე-555988778. გია ჯღალაძე, მეფუტკრე სპეციალისტი

სურსათის უვნებლობის მართვის თანამედროვე კონცეფცია - ჰასპი

კვება ადამიანის ცხოვრებისა და ჯანმრთელობის ერთ-ერთი მნიშვნელოვანი საკითხია.

სურსათის უვნებლობის სფეროში, საქართველოს ძირითად კანონს “სურსათის/ცხოველის საკვების უვნებლობის, ვეტერინარიის და მცენარეთა დაცვის კოდექსი” წარმოადგენს, რომლის მიზანია, ადამიანის სიცოცხლისა და ჯანმრთელობის დაცვა.

საქართველოს კანონმდებლობა სურსათის უვნებლობასთან დაკავშირებით, ეტაპობრივად უახლოვდება ევროკავშირის არსებულ რეგულაციებს. დღეისათვის, უვნებელი სურსათის წარმოების ყველაზე ეფექტურ მეთოდად არის მიჩნეული ჰასპის კონცეფცია, რომლის საწარმოში დანერგვა, უზრუნველყოფს უვნებელ სურსათის წარმოებას.

სურსათის უვნებლობის უზრუნველყოფისათვის პასუხისმგებლობა, პირველ რიგში, ეკისრებათ სურსათის მწარმოებელ კომპანიებს, შესაბამისი სახელმწიფო სტრუქტურები(მ.შ. სურსათის ეროვნული სააგენტო) უფლებამოსილია აკონტროლონ სურსათის მწარმოებელი ბიზნესოპერატორების მიერ ამ საკითხთან დაკავშირებული ვალდებულებების შესრულება.

უვნებელი სურსათის მართვის თანამედროვე სისტემა ე.წ. ჰასპი, უკვე დიდი ხანია დანერგილი აქვთ სასაკლაოებსა და ობიექტებს, ნაღდი რძის თერმულ დამუშავებას ახდენენ, გასული წლიდან კი აღნიშნული მიდგომის დანერგვის ვალდებულება აქვთ მთელ რიგ ობიექტებს.

საქართველოს მთავრობის 2010 წლის 25 ივნისის №173 დადგენილების თანახმად, ბიზნესოპერატორს, რომელიც ახორციელებს ცხოველური წარმოშობის სურსათის წარმოებას ან/და გადამუშავებას(მაგ: ხორცი და ხორცის პროდუქტი, თევზი და თევზის პროდუქტი, თაფლი და ა.შ), ასევე საცალო ვაჭრობის პუნქტში ახორციელებს სურსათის წარმოება/გადამუშავებას, აქვთ უკვე ჰასპის დანერგვის ვალდებულება.

საცალო ვაჭრობის პუნქტი, განმარტების თანახმად, არის ობიექტი, სადაც ხორციელდება სურსათის საბოლოო მომხმარებლისათვის მიწოდება. მაგ: საზოგადოებრივი კვების ობიექტი, სასადილოები, ორგანიზაციებში არსებული კვების ობიექტები, რესტორანი, სუპერმარკეტები და ა.შ.

აღნიშნული სიახლის შესახებ ინფორმირებულები არიან ბიზნესოპერატორები. შეიძლება ითქვას, რომ ნახევარფაბრიკატების საწარმოებმა წარმატებით შეასრულეს ეს ვალდებულება. თუ აქამდე არ იყო გათვალისწინებული ჯარიმა აღნიშნული მოთხოვნის შეუსრულებლობაზე, ახალი წლიდან გამოიწვევს ბიზნესოპერატორის დაჯარიმებას საქართველოს კანონის „სურსათის/ცხოველის საკვების უვნებლობის, ვეტერინარიისა და მცენარეთა დაცვის კოდექსის“ შესაბამისად.

რა არის ჰასპი (HACCP)?- ეს არის კრიტიკული საკონტროლო წერტილების მართვის ანუ უვნებელი სურსათის მართვის სისტემა, რაც გულისხმობს, რომ სასურსათო ჯაჭვის ნებისმიერი რგოლი - ფერმერი, მწარმოებელი, დისტრიბუტორი, სავაჭრო თუ საცალო ქსელის ობიექტი სრულყოფილად უნდა ფლობდეს ინფორმაციას გამოყენებული ნედლეულის, წარმოების ეტაპების შესახებ, რათა ზუსტად დაადგინოს, თუ რა ეტაპზე შეიძლება სურსათის უვნებლობასთან დაკავშირებული პრობლემა წარმოიშვას, რა სახის შეიძლება იყოს იგი და როგორ შეიძლება ამ საფრთხის თავიდან აცილება. უვნებელი სურსათის წარმოების პირველი წინაპირობა შესაბამისი ინფრასტრუქტურის შექმნა და მისი სანიტარულ მდგომარეობაში შენარჩუნებაა, რაც, თავის მხრივ, ბიზნესოპერატორს გაუადვილებს თანამედროვე სისტემის დანერგვას.

აღნიშნულთან დაკავშირებით აქტიურად ვთანამშრომლობთ ბიზნესოპერატორებთან და მზაობას გამოვთქვავთ ნებისმიერ საკითხზე კონსულტაციისათვის.

ხათუნა ქიტიაშვილი, სსიპ სურსათის ეროვნული სააგენტოს შიდა ქართლის რეგიონული სამმართველოს უფროსი ინსპექტორი



პატარა მხატვარი - დიდი მომავლით

გამარჯობა, მე ვარ საბა ღონდაძე, 9 წლის, თვითნასწავლი მხატვარი-ასე გამეცნო და ასე დაიწყო ჩემი პირველი შეხვედრა და კომუნიკაცია გონიერთვალეზა ბიჭთან, რომელიც აღმოჩნდა, რომ სამეაროს ისეთი ფერებით ხატავს, როგორც მას წარმოუდგენია, ბავშვურად ფერადი, კეთილი და ხალასი. დიდი მხატვარივით საუბრობს, როგორც ინსპირაციასზე, ტექნიკაზე, მომავალზეც. საბას ნახატებმა, საახალწლო გამოფენაზე მიიქცია ჩვენი ყურადღება, განსაკუთრებული დამოკიდებულება იგრძნობოდა ფერების, ფორმების მიმართ. ახლა ხატვის მასწავლებელთან დადის, პროფესიულად ემზადება დიდი მიზნებისთვის და თავისი ნიჭიერების ღრმად სწამს.

- თვითნასწავლი მხატვარი ვარ, როგორც ჩემი მშობლები მეუბნებიან, სამი წლიდან ვხატავ, პირველი ნახატია კაცუნა, რომელიც ფლომასტერით შევასრულე და ჩემს ოჯახში დღემდე ინახება. ხატვა არ შემიწვევია არც საბავშვო ბაღში, მასწავლებელი ძალიან მაქებდა. სკოლაში მისვლის შემდეგ, უკვე ხატვის მასწავლებელთანაც დავიწვევ სიარული, რომ უფრო პროფესიონალურად შემესწავლა ხატვა.

- რას ნიშნავს შენთვის ხატვის პროცესი, რა შეგრძნებები გაქვს ამ დროს?

- ხატვის პროცესი ძალიან მომწონს, ყველაზე კარგად ამ დროს ვგრძნობ თავს. როცა ვხატავ, ბუნებაში ვეძებ ფორმებს, რომ ტილოზე გადმოვიტანო. მაგალითად, ღრუბლებში ნიანგი, ვეფხვი და სხვა ცხოველები ვიპოვე. ყველაზე მეტად, დამე ხატვა მიყვარს, როდესაც მართო ვჯდები და ფუნჯს ვიღებ ხელში, მშვიდად ვარ და მობილიზებული.



- ტილოზე ხატავ?

- დიახ, ტილოზე ვხატავ. თავიდან ფანქრით ვხატავდი, სკოლაში მისვლის შემდეგ, უკვე საღებავებზე და ტილოზე გადავედი. მეორე წელია, ხატვაზე დავდივარ და ძალიან მომწონს სწავლის და ცოდნის გაღრმავების პროცესი. აკრილით და გუაშით ვხატავ. ყველაზე მეტად ბუნების პეიზაჟების ხატვა მიყვარს, ცხოველების. პორტრეტების ხატვა ჯერ არ დამიწყია, ერთხელ ვცადე, არ მომეწონა ჩემი ნახატი და ვცდილობ, დავიხვეწო.

როგორც ბებია იხსენებს, ტილოზე ხატვა საბასთვის არავის უსწავლებია, თვითონ გადავიდა ტილოზე, ამის მერე გადაწყვიტეს, ბავშვი ხატვის მასწავლებელთან მიეყვანათ. ნათია ხუციშვილი საბას ხატვის მასწავლებელია, საბა მასთან სახლში დადის და დიდი სიყვარულით და პასუხისმგებლობით ეკიდება ხატვის შესწავლის პროცესს.

- შენი სივრცე თუ გაქვს, სადაც ხატავ?

- ამ ეტაპზე, ჩემი სამუშაო სივრცე არ მაქვს, სადაც სიმშვიდეა, იქ ვხატავ. ზაფხულში გარეთ ხატვა მიყვარს, უფრო მეტ ფერს და ფორმას

ვიღებ.

- გიორგი კეკელიძესთან შენი დამეგობრების ამბავი მოგვიყვი - როგორც ვიცი, ბებომ გაუზზავნა ჩემი ნახატები ბატონ გიორგის, რომელიც ძალიან დაინტერესდა და გვესტუმრა. დაათვალიერა ჩემი ნახატები, ძალიან მოეწონა და დამპირდა, რომ ეროვნულ ბიბლიოთეკაში გამიკეთებს ჩემი ნახატების გამოფენას, მქონდა ონლაინ გამოფენა, სადაც ავიღე დიპლომი, მარტში მექნება გამოფენა საქართველოს ეროვნულ უნივერსიტეტში. სადაც 10-მდე ნახატი იქნება წარმოდგენილი.



- ნახატების გაჩუქება და სხვა ადამიანების გახარება თუ გიყვარს?

- რამდენიმე ნახატი გავჩუქე, რამდენიმე გავყიდე კიდევ. პირველი ნახატი საახალწლო გამოფენაზე გავყიდე 60 ლარად, ამ თანხით ისევ ტილოები და ხატვისთვის სხვა მასალა ვიყიდე.

- როგორც ვიცი, გადაცემის სტუმარიც იყავი და უკვე გიცნობენ, როგორც პატარა, ნიჭიერ მხატვარს.

- 4 დეკემბერს სახლში მესტუმრა გიორგი კეკელიძე საზოგადოებრივ მაუწყებელთან ერთად, დაათვალიერეს ჩემი ნახატები და სიუჟეტიც გააკეთეს. ძალიან გამახარა მისმა სტუმრობამ და იმან, რომ ჩემით დაინტერესდა.

- ახლა რაზე მუშაობ, რას ხატავს საბა?

- პოეტი და კომპოზიტორი მანანა ვარდოსანიძე, გამოსაცემად ამზადებს საბავშვო მუსიკალურ წიგნს, რომლის ილუსტრაციების ავტორად მე შემარჩია. 10 ლექსია და მის სამხატვრო გაფორმებას მე ვაკეთებ, პონორარიც წინასწარ ჩამირიცხეს და ვემზადები ხატვისთვის. უკვე დაეხატე რამდენიმე ილუსტრაცია და ძალიან კმაყოფილია ჩემთან თანამშრომლობით.

- სამომავლოდ, რა პროფესიას ირჩევ?

- ექიმი მინდა გამოვიდე და საკუთარი კლინიკა მქონდეს, თავისუფალ დროს კი ჩემს საყვარელ საქმიანობას, ხატვას დავუთმობ.

თ. ჯავახიშვილი

- იუმორი -

კლასიკოსები კოვიდ - 19 -ის შესახებ

გალაკტიონი

ქარი ქრის, ქარი ქრის, ქარი ქრის, ვბარბაცებ, თითქოს ვარ ნაცემი, საშველი ერთია, ერთია: აცრები, აცრები, აცრები!

მურმან ლებანიძე

უფლისციხესთან სისხლისფერი ყაყაჩოს წვეთი, ნიშანი არის, რომ გამქრალა ირგვლივ ბაცილა... დროა, მიბადონ აქაურებს სხვა ქართველებმაც- უფლისციხეში ყველა აცრილა.

ანა კალანდაძე

- თქვი, არჯაკველო, ხვიარავ, ქსანზედ ვინ ჩამოიარა? - ბუსტერ დოზაზე ვფიქრობდი, და არა გამოიარა!

გოგლა ლეონიძე

ყორდანებიდან გნოლი აფრინდა, ბუმბულის ვარცხნას მოჰყვა ნეკნიდან, გუნდს შეერია, არ ეშინოდა, აცრილი იყო, ფეხზე კვიდა.

ნიკოლოზ ბარათაშვილი

მიჰქრის, მიმაფრუნს უგზოუკვლოდ ჩემი მერანი, მოგვედეს ყორანი, მიუღია სიკვდილის პოზა, არ გვეშინია, შენი, ყვაო, მეც და მერანსაც, გუშინწინ უკვე გავიკეთეთ ბუსტერის დოზა.

დუტუ მეგრელი

მე პატარა ქართველი ვარ, კავკასიის მთების შვილი, აცრილი ვარ სამი დოზით, ამიტომაც სულ ვარ მშვიდი.

ილია ჭავჭავაძე

ჩემო კარგო ქვეყანა, რაზედ მოგიწყენია? აცრილი ვართ სუყველა, მომავალი ჩვენია.

აკაკი

საყვარლის საფლავს ვეძებდი, ვერ ვნახე დაკარგულიყო, ავეცრა დროზე და ერთად, ხომ ვიქნებოდით, სულიყო ?!

ვაჟა

მაცნე მოიდა შატისლა, ქისტებმა მოგცეს ზიანი, ამიტომ ყველა ავიცრათ, დღენი რომ გვეკონდეს მზიანი.

იეთიმ გურჯი

კარგი იყო, არ გამეცან თავიდან, არ აიცრი? გადაგადგებ ნავიდან.

ტერენტი გრანელი

ავად ვიყავი, წუხელ ვკვდებოდი, და ჩემზე ფიქრობს ალბათ, ზოზია, ავიცერი და კი ვარ კაჟივით და ჩემში ახლა ანგელოზია.

ლადო ასათიანი

ხომ ღამაზია ეს ჩემი ცოლი, მშვენიერება მხერთ გავცერი, მინდა, რომ იყოს მუდამ ჩემს გვერდით, და ამიტომაც სამჯერ ავეცერი.

მუხრან მაჭავარიანი

და დღეს თბილისის ქუჩებში დადის აცრილი გივი, ლონდა თუ ნანი და იარონ, იარონ, იარონ, ამინ!!!

ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი და გაზეთის რედაქტორი გიორგი გოგალაძე. მისამართი: ხაშური, ტაბიძის ქუჩა №2. ტელეფონი: 24 30 27.

E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.

♣-ით მონიშნული სტატია იბეჭდება დაკვეთით გაზეთი იბეჭდება თბილისში.